



Maloba ma Tata episkopo po ya eyenga ya Mbotama 2017

« NAYEI KOSANGELA BINO SANGO YA ESENGO... »

Butu bwa mbotama ya Kristu, o kati ya bilielo ya nyama, ezali lokola butu ya mawa. Mpamba'tè, mikolo miyike penza, mabota ndenge na ndenge bilongwe bisika bya bango mpo ya kokomisa kombo o mboka ya bankoko ba bango, na etinda ya Mokonzi Ogusto. Ezali likambo ya kokamwa té, na bomoni'tè, bisika bizalaki lisusu té o ndako ya bapaya. Yango wana, Maria na Yozefu bazwaki se esika ya komibomba o ndako ya nyama. Mawa ya butu eye, ezali lolenge loko na mawa ya mabota ma ye makokutanaka na kwokoso ndenge na ndenge, ndakisa'tè, boko o kati ya bango bazali lisusu na esika té o kati ya lisanga, zambi bazali na lolanda, bibosono, matoi makufa to bazali na maba. Suka suka, mawa ya butu eye ezali ya bato baye bawumelaki na boumbu o maboko ma ba roma.

Nse o ntei ya butu boye bwa mbotamba, anzele ya Mokonzi ayebisi bakengeli ba mpata : « Naye kosangela bino sango ya esengo » (Luk 2, 10). Sango ya esengo ena, ezali sango ya mbotama ya mobikisi, oyo azali mwinda o kati ya molili. (cf. Luk 2, 9). Mpo ya ye, bato ba lolanda bakomono, bibosono bakotambola, bato ba maba bakopetwama, baye bakufa matoi bakoyoka, bawa bakosekwa, babola bakoyoka sango elamu. (cf. Luk 7, 22).

Na mokili ya lelo, sango ezali kotambola na lombango penza, kasi mazali mpe kolekisa makambo maike ya kwokoso makozangisa molongo mobimba elikya, lokola'tè molongo mobimba bikwei o kati ya molili suka te. Biso bayekoli ba Yezu tokoki komitika té, o kati ya mambi mabozangi elikya. Tika été, Eyenga ya Mbotama ya Mokonzi Yezu ekundolela biso'tè, tobyangami mpo ya kosangela bato sango ya esengo mpo'tè, molongo mobimba elongwa seko, na mambi mabozangi elikya. Bayekoli ba Yezu, tosengeli kosangela sango ena ya esengo o ntei ya mabota ma biso, mpe o masanga ma biso. Epusi malamutè tozua ngonga ya kosepela elongo. Tozua mpe ngonga ya kosepela mpo ya mambi malamu makosalemaka o ntei ya biso mokolo na mokolo. Tozua mpe lisusu ngonga ya kosepela mpo ya baye bazali komipesa na ntina'tè bondeko bokola o kati ya mokili.

Tika été, eyenga eye ya Mbotama elendisa biso mpo to tambwuisa sango ya esengo o ntei ya biso. Etinda eye elingi koloba'tè té tokobosana kwokoso ya mikolo na mikolo. Kasi soko tosengeli kosangela sango ya esengo, ezali po toyambi'tè, ut'o mbotama « mwinda mongengi o kati ya molili, mpe bato ba molili bazali na makoki ma kokanga yango te » (Yo 1, 5). Mwinda mona nde mozali tina ya esengo ya biso.

Natombeli moko moko na bino, mabota ma bino, mpe masanga ma bino manso, eyenga elamu ya mbotama.

+ Mgr Pascal Delannoy

Episkopo wa Dioseze ya Santu Denis (Saint-Denis-en-France)